

貴州通志



貴州通志卷之三十五

藝文

疏

國朝

廣教化疏

趙廷臣

爲貴州苗多民少急請廣示教化仰祈

睿鑒勅部議覆事竊惟貴州古稱鬼方自大路城市外
四顧皆苗其貴陽以東苗爲夥而銅苗九股爲悍
其次曰獐狍曰狍獍曰八番子曰土人曰洞人蠻
人曰冉家蠻貴陽以西羅羅爲夥而黑羅爲悍其
次曰狝家曰宋家曰蔡家曰龍家曰白羅雖種類

不同要皆專事鬪殺不講孝弟忠信絕先王禮義之教尙强凌衆暴之習其來舊矣故馭苗者往往急則用威威激而叛緩則用恩恩濫而驕稽古舜用干羽漢武封夜郎武侯縱孟獲非故寬之也皆有深意存焉蓋以教化無不可施之地而風俗無不可移之鄉也苗性至詐而可以信孚苗性至貪而可以廉感其作梗衝路宜效保甲之規其讐殺抄刦宜立鷗剿之法又賞罰之條必信餽送之陋必革凡此皆臣所當悉心力行不敢贅陳惟是我皇上創闢大一統之業開億萬年文明之休乘此遐荒開闢之初首明教化以端本始其大者莫如作養

世祿今後土官應襲年十三以上者令入學習禮
由儒學起送承襲其族屬子弟願入學者聽補廩
科貢與漢民一體仕進使明知禮義之爲利則儒
教日興而悍俗漸變矣又莫如預制土官大夫土舍
私相傳接支系不明爭奪由起爭奪不已釀成變
亂今後每遇歲終令土官各上其世系履歷及有
無嗣子開報布政司三年當入

覲則預上其籍於部其起送襲替時有爭襲騷擾者按
籍立辨斯方策旣明而釁端預杜矣此黔省馭苗
根本之圖折衝樽俎之計倘蒙

皇上誕敷文德廣示教化使土屬入學習禮得與幫補

貴州通志 卷之三十五
科貢土官按籍襲替不致爭土奪職庶乎風俗不
變遠邇苗民共沾

王化無疆矣

借發倉米賑饑疏

卞三元

爲窮荒無米可買饑民日報逃亡仰體

皇仁借發倉米以救餘黎以保巖疆事該臣看得民爲
邦本食爲民天國無民不可以成治民無食不可
以資生今各處申報饑斃甚多望救甚迫若使畏
罪因循視民就死臣於撫民之責謂何臣若敢於
負民實負

皇上付託一方之盛心也目今饑餓而死者旣不能復

生生者又奄奄就斃臣何敢惜撥運之楚船而不
救新服之窮赤也况救民急於救火告必待請
命而後濟之則京路往返一萬七千餘里必越四五月
之期乃奉

俞旨而僅存之餘粟豈能慈饑以久延乎臣聞漢臣汲
黯奉使於外無詔開倉賑活一方饑民願受專制
之罪實體君心愛民之殷切耳臣以謏劣庸才何
敢妄引古良臣之義而蹈市恩之愆伏念

皇上之德意大歲大發

帑金賑恤游黔窮民全黔窮黎已沾實惠但窮民甚多
米價甚貴分給之銀每名不過一兩有餘止可救

旬日之生更有無米可買之處是以饑饉之報接踵而至臣今以慘苦難言之狀刻不容緩之時敢仰體

皇仁借發鎮遠府楚運倉米三千石以救各處殘民生命卽於拜疏之日開倉發賑分遣能幹官員星馳賑荒地方協同道府州縣官沿門查人口多寡酌量給散務期將斃之民保全餘生仰慰

皇上仁愛荒服之至意臣卽受專擅重譴亦不敢辭其給過米數或壯作賑荒之例不復收償尤其開銷或止准借給仍令秋收日照數追還伏乞

勅下部議費臣遵奉施行

舖兵工食疏

佟鳳彩

爲痛陳私派之源仰祈

睿鑒等事一曰舖兵苦役日費不足查別省舖兵俱有
額設工食黔省通雲南孔道崇山峻嶺羽檄交馳
晝夜不息每舖兵一名止日給米一倉升夫一倉
升之米供本役一日之食尙且不足又無閑隙可
以別求營生其父母妻子誰爲代養是以招募無
人肯應勢必勒令百姓輪當一經輪當居近大路
者尙可勉應其役若遠居一二百里之外者必致
歛銀轉僱倘一歛銀其鄉保頭人借題多派百姓
不寧爲今之計或念黔中山高箐深舖兵苦役除

日給米一升外再照他省日給工食銀二分庶公務不悞百姓亦免騷擾矣

添設驛遞疏

佟鳳彩

爲黔山萬疊驛路險遠異常馬匹萬難支持謹繪圖恭請

睿鑒勅部亟爲調劑添設以速軍機以蘇驛困事竊惟天下之苦累者莫過於驛站驛站之險遠最苦者莫甚於黔省夫黔省爲滇南咽喉之地在在皆石山峻嶺上則登天下則履壁上而復下下而復上俗言地無三里平者委無虛謬也夫擡一站勢必足破肩穿馬走一站亦必蹄癩脊爛甚至力不能

勝中途逃斃者徃徃有之且以每驛額馬不過五十匹夫不過一百名每馬日支稻穀不過五倉升草一束每天日支米不過一倉升銀一分五釐當此滇黔孔道徃來差使如織司驛者徒被叅處究竟無補實用此黔省道路之艱險非臣敢臆說卽當日領兵關黔之諸大臣與夫近日徃來之

欽差皆身履其地而目擊其苦者也蓋前此之所以勉力支撐者當軍興旁午之時不暇計及於民夫馬雖有官應之名其實協幫於闔省之里甲以致天末民苗耕不能耕織不能織苦累難堪流離日甚但屢奉

嚴綸不許私派百姓於康熙八年七月內臣與督臣再
回籌酌將百姓協幫驛站者痛加革除止責令司
驛各官極力應當今已年餘百姓雖稍有起色田
土漸墾獨驛站去其幫貼實萬難撐持兼之黔省
今歲馬匹瘟疫更甚倒斃益多臣見在另疏具

題今除各站坡嶺雖險而道路稍近者不敢妄請外
如貴陽之東至湖廣則有興隆以至清平驛實有
九十餘里除無名坡嶺不計外中有鬼門關坡黃
猴坡小觀音坡大觀音坡落蹬坡皆崇山峻嶺中
隔一重安江應於重安江設一腰站清平以至平
越驛實有八十餘里除無名坡嶺不計外中有

梅坡三十三坎坡楊老坡羊場坡三郎坡高橋坡
皆艱險異常應於楊老設一腰站平越以至新添
驛實有一百餘里除無名坡嶺不計外中有五聖
關坡倒馬坡虎場營坡西陽坡黃絲坡獐羅坡打
杆坡望城坡皆石如狼牙人足馬蹄無有不傷者
應於黃絲設一腰站再如貴陽之西至雲南者如
查城驛以至安南驛實有一百餘里除無名坡嶺
不計外中有梅子坡黃土坡北極觀坡盤江河盤
江坡保甸坡哈馬坡高則一望無際深則萬丈有
餘應於盤江設一腰站安南以至新興站實有九
十餘里除無名坡嶺不計外中有馬跑泉鳥鳴坡

腊茄坡江西坡泥納坡陡如立壁行似穿雲應於江西坡設一腰站新興以至普安驛實有八十餘里除無名坡嶺不計外中有望城坡羅漢坡爛橋坡鸚哥嘴坡軟橋坡舊普安坡鉉壇坡倒馬坡皆懸崖深澗盤旋崎嶇應於軟橋坡設一腰站以上六站路遠山高馬力愈竭而鞭策愈疾以至壯者傷疾者斃司驛者痛哭無術報例者幾無虛日若不亟爲調劑必致整頓無期故臣敢以冒昧請設腰站每站照例設馬五十匹馬夫二十五名其六站驛丞倘另議設官不無添官之費查興隆衛見有經歷一員可以移主重安腰站喂馬支應

理銷算仍責成興隆衛守備平越衛見有經歷
司可以移至楊老腰站喂馬支應而督理銷算仍
責成平越衛守備平越府見有經歷一員可以移
至黃絲腰站喂馬支應而督理銷算仍責成平越
府知府永寧州見有吏目一員可以移至盤江腰
站喂馬支應而督理銷算仍責成永寧知州安南
衛見有千總一員可以移至江西坡腰站喂馬支
應而督理銷算仍責成安南衛守備普安州見有
吏目一員可以移至軟橋腰站喂馬支應而督理
銷算仍責成普安知州至於買馬銀兩查有康熙
八年

奏銷驛站節年存剩銀一萬五千餘兩應將此項銀
兩動支買馬三百匹六站均分喂馬料穀馬夫食
米應於貴州官庄租穀秋糧內通融支給統候年
終

奏銷惟是設站之後馬有倒斃例應添補及應用鞍
屨腳蹤藥餌棚廠鑼刀以及馬夫工食等銀每年
約該一萬一千九十餘兩黔省實無別項可動勢
必於他省餘剩驛站銀內照數撥黔協濟庶遐荒
民苗之殘苦得以稍蘇而緊急軍機均有攸賴矣
臣非不知錢糧匱乏之際偏僻驛站尚在議減議
裁猶敢添設糜費但臣身任地方之責目擊其艱

不得不痛陳於

皇上之前也

題禁協夫疏

甘文焜

爲恭陳協夫爲黔民之大害特請

天語嚴飭永禁事竊臣於康熙八年五月二十八日抵黔任事沿途村落凋零民苗困憊目擊實所不忍初尚未解其故及履任博採輿情細察民隱始知病在兵燹之後協夫繼之也查開黔之初順治十六年設驛馬匹官養官當每驛設馬夫二十五名每名月支工食銀六錢米三斗因僱覓乏人前撫暫令隣近漢土百姓代應養馬彼時大兵雲集餉

鞘繁多經畧臣洪承疇

題請給價僱夫擡運緣民人稀少前任撫臣趙廷臣
議於相聯僻壤州縣每站派幫夫數十名原期不
誤餉鞘不過一時以軍機爲重權宜之意既經

題准自康熙元年爲始每站設長夫一百名每名月
支工食銀四錢五分米三斗應差所有派幫之夫
自應免派不意各官僱募不力仍照前派幫濫用
相沿年久竟爲成例以致民苗不得耕種躲避廢
業米價騰貴村落荒殘民窮不堪臣訪得實會同
撫臣佟鳳彩已於康熙八年七月二十日痛革轉
飭各驛站一遵定例募僱長夫遞運餉鞘其濫索